



# L'onn 2025 en il Museum da la natira dal Grischun

## Nova atgna producziun:

### Exposiziun speziale: La vulp – adattaziun maisterila

Dals 10 d'avrigl 2025 (vernissascha: 9 d'avrigl) fin ils 18 da schaner 2026 po vegnir visitada la nova **exposiziun speziale «La vulp – adattaziun maisterila»**, in'atgna producziun dal Museum da la natira dal Grischun. La vulp è fitg derasada e populescha guauds, cultira, muntognas e schizunt citads. La vulp demussa ch'ella è ina maistra conformista che sa s'adattar a differentas cundiziuns da viver. La percepziun umana tanscha dal nausch lader da giaglinas fin al furber artist survivent. Malsognas, traffic e persecuziun tras l'uman decimeschan il dumber da vulps. Ma cuntrari a bleras outras spezias d'animals fa la vulp frunt a questas difficultads. Co fa ella quai? E tge sa zuppa davos quest animal che tuts enconuschan e che sa mussa – sch'ins guarda pli bain – sco in enconuschen nunenconuschen?

Anc fin ils 19 da schaner 2025 vegn ospitada **l'exposiziun speziale «evolution happens!»** en il Museum da la natira dal Grischun. Exempels pratics e levamain chapaivels da la medischina, da l'agricultura e da la protecziun da la natira mussan, tge che l'evoluziun è e co ch'ella funcziuna. L'exposiziun è vegnida elavurada dal Museum zoologic da l'Universitat da Turitg.

Sco «object dal mais» pon ins contemplar mintgamai exponats spezials. Il favrer vegnan a vegnir tematisads il terren e sias creatiras.

Sche **randurels pitschens** cuan l'onn 2025 puspè en ina chasetta da gnivar dal Museum da la natira, vegnin nus danovamain a mussar lur activitads sin in monitur en il museum.

## Activitads multifaras

In program accumpagnant multifar cun referats, visitas guidadas ed excursiuns cumplettescha las infurmaziuns da las exposiziuns.

En il **Rendez-vous am Mittag** infurmeschan referats tranter auter davart bisons europeics en Svizra, davart terrens stressads, davart vulps en las citads ed en il Parc Naziunal, davart terratrembels u davart simbiosas tar insects.

En la retscha da referats **NATURsPUR – referats per personas da 9 onns e dapli rapporta Flurin Camenisch** davart baus, vulps, simbiosas e davart sutlocataris secrets.

**La natira la saira** èn visitas guidadas tras las exposiziuns permanentas. L'onn 2025 vegnan preschentads il mund dals utschels a Cuira, fastizs d'animals, lindornas sco er strategias per passentar l'enviern.

Il program da referats da la **Societad grischuna per la perscrutaziun da la natira** (SGN) s'occupa dal center per la protecziun da la natira dal Zoo Turitg, da la medischina per novnaschids, da l'importanza dals nums d'animals, dal nutriment en il futur e da las crudadas da crappa. Ils 13 da mars 2025 surdat la SGN ils premis da promozion per las meglras lavurs da maturitat en il rom da las scienzas naturalas.

Danovamain vegn purschida in'excursiun da notg en il Scaläratobel. Ella ha lieu mesemna, ils 7 da matg 2025.

Tut las infurmaziuns davart il Museum da la natira dal Grischun e davart temas actuals chattais Vus sut [www.naturmuseum.gr.ch](http://www.naturmuseum.gr.ch). Midadas dal program èn pussaivlas.